



袁永之集卷之七

七言近體

大駕還京五首

秋興六首

大漸二首

中興三首

駕出南郊

齋宿省署

候駕

立春日早朝



五日從游西苑應制

出左掖喜雪呈少宰徐師

恭謁孝陵

朝陵三首

金陵懷古

大梁城樓作

謁岳武穆祠

泛洞庭

登匡廬山

陪大宗伯張公遊鳳凰臺遂宴西園辱教

次韻二首

元日宴都司

陪文太史脩禊桃花園

立秋日山樓觀雨

中秋日西湖舟宴

九日雨花臺諸僚友宴集

九日陳太守允揚邀登峴山

登大茅峰

觀碧巖瀑布泉

蘇灣山面碧浪湖其下有田可買頗懷築

室之志苦貧無貲作此解嘲

湖上觀雨

桃花園

采香涇新庄

黃山草堂成

灌園作

詠白燕

池蓮

連理秋蘭

客去

同孫行人文會飲胡安定墓下

江寺副于春過飲橫塘莊遂同泛石湖

宿大司空安仁劉公山莊二首

宿施憲副聘之古朴樓

盧師陳卜居城東携酒相顧

臥病桃花園文太史期過訪詩以速之

過仲兄謝湖別業

伯兄携酒肆志園賞菊

夜飲仲兄山莊

澣溪草堂爲朱天民賦

題陳職方魯得五山別業

題孫秀才菰城別業

送大司徒鄒公歸湖南

送戴孟光宰金壇

送湯時敏謫官安慶

送南仁父守徽州

送人官南康

送人游洞庭

虜退二首

山中寄履吉

法華庵寄吳興諸友

度崑崙關寄馬侍御君卿

荅大司空劉公見懷

宗伯昭過訪辱詩奉荅

荅陳太僕魯南

荅蔡文九達

荅履吉見懷

施憲副過宿列岫樓

奉次大司馬總督蔡公征黎二首

次電白觀海

次遂溪書事

次文太史見寄

袁永之集卷之七

大駕還京五首

霓旌曉發罷東巡羽衛天行望紫宸黯黯風雲
懸太白闐闐鏡鼓翼鈎陳長楊校獵陪群后岱
嶽登封禮百神問俗陳詩重游豫千秋詞賦鄙
橫汾

鞞鞞彤弓親視師凱旋十萬羽林兒山川暗警
龍輿度日月行瞻黼座移江右已通吳貢賦淮
揚親覩漢官儀丹書白馬千年約鹽海銅陵異
日悲

大駕喧傳戒北征，旌旗猶閃石頭城。行宮鼓吹
紛淮甸，馳道煙花接鎬京。闔闔雲開宮扇影，鳳
池風繞禁鍾聲。千官鵠立朝班裏，縹緲爐烟望
聖明。

朔方諸將本梟雄，附翼攀鱗易立功。北去關河
三面險，南來機杼萬家空。運籌制勝聞司馬，玉
戚金貂羨揔戎。今日凌烟誰第一，我皇親爲
奏車攻。

江淮租賦古稱雄，數歲征求苦不供。士馬豈堪
勞餽餉，倉箱何以備荒凶。屯田久已思平糴，銷

甲誰當復務農，胡騎昨聞窺上谷。急將漕粟轉
居庸。

秋興六首

清秋抱病強登臺，南國浮雲萬里來。尺素亦隨
鴻鴈杳，一尊難對菊花開。風塵舉目山河異，老
大傷心歲月催。遙望金陵霄漢裡，泠泠黃竹不
勝哀。

月白霜清上庾樓，感時懷抱更悲秋。榆關烽火
連邊徼，漢苑芙蓉夾御溝。天子征南親拜將，
嫖姚專閫未封侯。羯胡羣盜猶猖獗，轉餉征輸

盡可憂

塞上秋高胡馬肥材官羽騎救重圍受降城壞
人難到住牧河深事已非鹽課不登邊餉闕客
兵常借羽書飛 文皇定鼎開天府獨石居庸
拱 帝畿

南徐北固是揚州吳楚風煙動地秋四顧關河
今夕照八荒戎馬幾時休銑歌奏凱喧川陸禁
旅專征衛冕旒三載巡遊車轍遍軍中時望大
刀頭

金陵自古帝王都 太祖開基孕寶符王氣千

年盤日月山河百二擁荆吳宮城曲抱秦淮水
寢殿平臨玄武湖寂寞遺弓龍去遠宸遊今日
自歡娛

仙仗行宮舊內居花間往往駐鸞輿徒聞漢帝
橫汾曲不見長卿諫獵書 天子射蛟開水殿
奚官牧馬遍郊墟蒹葭苜蓿秋無限悵望燕雲
萬里餘

大漸二首

南征北伐罷王師淚灑千官大漸期慷慨輪臺
下詔日淒涼玉几託孤時白狼未受西戎貢黃

竹愁聞夢澤辭寂寞橋陵松梓裏行人誰起雍
門悲

武皇仙駕已千秋細草荒烟蔓廢丘龍虎團營
新選士金張邸第舊通侯花深輦道萋萋色水
咽宮墻曲曲流往事蕭條都莫問咸陽黃犬不
勝愁

中興三首

大明九葉中興年 憲廟諸藩親且賢花迎羽
蓋朝馳洛雲引旂常夜入燕代邸璽符同勸進
渭橋冠冕奉周旋蓬萊春日朝宗會獸舞嵩呼

望九天

紫禁青春拂曙開葱葱佳氣指三台臨軒詔出
宮花賜耕籍躬勤玉輅回即喜賈生宣室召更
聞司馬洛陽來遙想賡歌鳳池裡群工稽首咏
康哉

十道循行使者勞鳳啣丹詔下雲霄山東扶杖
觀 王化河北投戈歛 聖朝疇昔尚方頻賜
予何時少府罷征繇留都根本開基地苦憶供
輸走百僚

駕出南郊

鸞輿曉出大明宮文武官僚扈從同袞冕遙瞻
九霄上旌旗如在五雲中笙鏞隱隱郊壇闕
路迢迢帳殿通殷薦禮成柴望畢天長地久歲
時豐

齋宿省署

大祀南郊卜孟春西曹齋沐集儒紳日長官舍
無公務鳥下庭階少吏人岸憤彈碁殊不俗檢
書燒燭喜相親抽毫欲獻甘泉賦授簡慙非侍
從臣

候駕

仙韶廣樂半空聞閶闔朝開鹵簿分隊隊五花
中旆馬紛紛六郡羽林軍行天警蹕馳清道合
殿爐烟散綵雲昧爽趨朝迎法從光華親覩
聖明君

立春日早朝

青旂蒼輅轉東郊剪綵栽花賜百條京兆獻春
傳木德天門頌朔舞雲韶魚迎淑氣窺泉脉鸞
轉和風變柳條惟有農祥協晨正願因千畝降
鸞鑣

五日從游西苑應制

閣試

蘭宮桂殿翠微中鳳輦宸游引上公鶯語巧隨
歌管細榴花嬌映御筵紅長秋揆日分絲縷侍
女承恩戲角弓魚藻萬年同宴鎬甘泉欲賦未
能工

出左掖喜雪呈少宰徐師

春空瑞雪舞縈迴八表彤雲曙色開明月猶懸
馳道直銀河疑瀉御溝來上林入夜花如霰廣
內平明玉作臺無羨郢人歌獨步願調商鼎和
鹽梅

恭謁孝陵

高皇陵寢枕鍾山悵望宮車不可攀表裡關河
環羽衛歲時朝謁走鶴班雲中絳節虛無見天
上金燈縹緲間王氣直連豐沛遠神靈長繞鼎
湖還

朝陵三首

諸陵遠在京師北帝遣祠官祭告來隧道陰
陰連大漠仙宮杳杳閉蓬萊玉魚葬地悲難盡
龍馭賓天去不回紫塞黃雲千萬里雍門西望
使人哀

七聖衣冠宅兆同左包遼海右雲中金輿玉几

開前殿太乙鉤陳嚴後宮陵寢萬年疑王氣松
楸落日起悲風先朝侍從今誰在密勿經綸有
數公

尚憶 文皇戰殺胡我明功烈古來無關門虎
據雄三鎮守衛龍驤走萬夫石獸崔巍窮制度
金滕詒翼閎謀謨小臣稽首 長陵下想像神
靈聚鼎湖

金陵懷古

古時王氣說金陵今代金陵是舊京鍾山作鎮
開天府江水爲池抱石城廬龍觀裏花空發白

鷺洲前草自生六帝霸圖悲霧滅千秋 皇業
憶龍爭

大梁城樓作時有潞賊之警

飛樓百尺層城上極目中原感慨多天設潼關
包大華地分嵩嶽枕黃河西山寇盜悲多壘北
闕旌旗望凱歌日暮憑軒空涕泗幾時諸將罷
干戈

謁岳武穆祠

朱仙當日恨班師地裂天傾宋室危百戰河山
空左袵千年松栢盡南枝江潮夜月英魂現禾

黍秋風故國悲和議祗談秦相失燕雲先已棄
遼夷

泛洞庭

曉發江潭下洞庭樓船天上坐揚舲中流雪浪
茫茫白兩岸雲山點點青楚客掛冠歸夢澤漁
人吹笛和湘靈岳陽樓上酒沉醉盡典朝衣忍
獨醒

登匡廬山

岩岩廬嶽近天都萬丈丹梯鳥道孤樹裏泉聲
飛瀑布空中烟霧起香鑪峰形下瞰蓮花嶺江

勢遙吞彭蠡湖白鹿仙巖何處是却看五老在
虛無

陪太宗伯張公遊鳳凰臺遂宴西園辱

教次韻二首

春遊相賞鳳凰臺晴日江山四望開歌舞空憐
遺事往登臨無復昔人來緣岡踈竹迷朱檻曲
水飛花逐羽杯共羨上公傳郢調誰云詞客有
仙材

蘭堂桂館列清尊飛蓋華軒集上園四座笙歌
爭選部幾叢花竹自成村江梅破臘香風度簷

鳥鳴春麗日暄乘燭夜遊方未已鳳城鍾鼓報
初昏

元日宴都司

喜從元日宴華堂莫問新春客異鄉殘雪漸消
莫試綠炎風初轉柳窺黃椒花竹葉同隨俗對
局探鈎各擅場共勸一杯還一歲萬年長此祝
君王

陪文太史徵仲修禊桃花園

風日喜臨佳節好林亭更愛小莊幽藥欄舞蝶
雙雙戲花沼群魚隊隊遊旋摘園蔬當鷄黍新

栽徑竹間葵榴亦知生計須農圃便擬青門老
丘

立秋日山樓觀雨簡朱日宣

急雨翻盆湖上來好風吹滿最高臺涼生水簟
秋先到病減文園暑盡回失意琴書聊自遣感
時懷抱爾誰開朱雲不見空相憶應對山僧弄
酒杯

中秋日西湖舟宴

朱簾盡舫競遨遊騎吹喧闐集渡頭繞岸山圍
青作障重湖波淨綠如油烟籠樹色含微雨風

引荷香接素秋今古繁華歌舞地東南佳麗帝王州

九日雨花臺諸僚友宴集

高臺登眺俯神京令節歡遊出鳳城晴日滿山
羅綺隊簫聲風隨路管絃聲江空落木孤帆急野
曠寒雲二鴈驚陶令孟嘉俱已矣紫萸黃菊倍
關情

九日陳太守允揚邀登峴山

澄湖碧水映晴空寶地青山列梵宮坐擁笙歌
娛九日亭邀冠蓋會群公黃花滿徑垂秋露盡

角層城度晚風樂矣登高還作賦忘懷真與孟嘉同

登大茅峰

三茅峰並翠岩堯宮觀參差傍赤霄歷井漸疑
天闕近乘風猶阻帝臺遙空中玉節元君降殿
裡珠衣羽士朝安得異人傳祕術凌雲徒有思
飄飄

觀碧巖瀑布泉

岩堯石磴躡香臺翠壁飛泉響萬雷急雨倒懸
珠沫亂微風斜颺水簾開銀河似向空中落素

練遙從望裏來廬嶽誰言過弁嶺碧巖今擬作天台

蘇灣山面碧浪湖其下有田可買頗懷築室之志苦貧無貲作此解嘲

山田十畝傍湖陰草屋三間對竹林地占清幽
宜卜築天教閒散得登臨葛洪自有移家志陶
令能無結社心已矣謀生真計拙東西南北任
浮沉

湖上觀雨

湖氣昏昏雨欲來山嵐如瘴蔽樓臺瑣窓白晝

霾陰霧巖壑清秋起暴雷落雁漸依漁網集歸
雅遙帶客帆迴書空終日知何益且復陶然進
一杯

桃花園

新莊近築桃花塢僻寂城闌遠市喧紅槿籬踈
環曲岍綠楊池小面幽軒時邀賓客教開筵日
課兒童學灌園乘興再來看芍藥一尊相賞過
郊原

采香涇新莊

誅茅闔闔城之西路轉采香涇上隄濃陰榆柳

綠當戶秀色芙蓉紅滿谿力田輸稅半栽秫鑿
沼養魚兼灌畦每愧長公高隱志杜門從此可

幽棲

張摯字長公

黃山草堂成

小堂僻寂橫塘濱溪水曲曲桃花新古榆高柳
自成墅沙鴨野鷗時近人邵園瓜熟足生計蔣
徑草荒無雜賓長夏江村更何事釣竿終日坐
垂綸

灌園作

綠水青門一畝宮土墻茅舍百花叢霜前早橘

已如錦秋後踈荷猶自紅抱甕還同漢陰叟避
秦豈學東園公臨流濯足不歸去酒熟隔籬呼
老農

詠白燕

燕燕差池繞畫堂驚看縞素雪衣娘梨花月冷
迷春夢柳絮風輕淡曉妝巷口誰家營玉壘掌
中何日舞霓裳不須更詠空梁什飛去飛來總
斷腸

池蓮盛開清晨往觀

林塘開滿芰荷花波面晨妝亂綵霞簇簇紅衣

承日整娟娟翠蓋倚風斜滿房新子含蜂蜜萬
顆明珠滾露華避暑祇宜河朔飲習池寧似野
人家

連理秋蘭詩 有引

余自西粵携歸秋蘭三本今歲季夏
花盛開奇芬秀色迥異常品中有兩
花駢而爲一合蒂聯英又不特連理
並頭而已客有以爲瑞者喜而賦之
幽蘭呈瑞挺芳蕤紉就同心佩陸離兩兩紫英
開並蒂雙雙綠萼綴連枝謝庭玉樹真堪侶楚

琬瑤葩未足奇向晚光風更吹拂月華香霧坐
相宜

客去

茂陵歸後日書空壯志銷零歲不同俗事厭聞
緣耳洗新文喜誦爲頭風右軍山下鷺成字陶
令籬邊菊幾叢薄暮問奇人已散倚欄翹首送
飛鴻

同孫行人文會飲胡安定墓下

澗水潺潺響白雲空山伐木聲相聞林深過客
畏虎跡地僻居人馴鹿群密竹短墻圍梵院高

松細路轉胡墳花時莫負春游興共爾狂歌醉
夕曛

江寺副于春過飲橫塘莊遂同泛石湖
每逢北使問京華忽漫停驂野客家小飲花前
張草具勝遊湖上附仙槎納涼宴坐迎風便聯
句忘歸恨日斜恠爾別來才思進江淹今已筆
生花

宿大司空安仁劉公山莊二首

桑麻彌望原田繞竹樹成行澗道分舟楫時通
具區水軒窓朝起弁山雲蕭疎生計漁樵事淡

泊機心麋鹿群此地何如簪組貴野人休更勒
移文

憶昨追趨畫省中自公多暇日相從豈知朝市
浮雲變猶喜江湖握手逢山靜停杯聞木葉夜
闌秉燭看芙蓉求田問舍能無意北里南隣作
老農

宿施憲副聘之古朴樓

丈人宅子茗谿濱余亦乘舟訪隱淪高樓遠望
見百里古樹濃陰遮四隣隙地種桑知有利薄
田栽芋豈憂貧細談往事傷心極湖海樓樓歎

此身

盧師陳卜居城東携酒相顧

長安城東新卜居閉戶蕭然只著書苑靜烟霞
聯禁密官清鳥雀下庭除論文苦愛高人傳好
客時來長者車躍馬携壺相問訊爲余沽酒解
銀魚

卧病桃花園文太史期過訪詩以速之

闔閭城北桃花園桃花夾塢如桃源一春病肺
惟高枕終日著書長閉門耽幽苦憶山林僻好
靜翻嫌鳥雀喧報道羊求不時到幾迴開徑候

高軒

過仲兄謝湖別業

五湖一曲輞川莊修竹千竿蔽草堂素練繞門
秋水淨翠屏當戶晚山蒼窮愁亦有田園樂習
靜能無著述忙弟勸兄酬自茲始也須斗酒醉
柴桑

伯兄携酒肆志園賞菊

天明折簡報花開日午移舟載酒來荷鍾親除
蔣生徑解衣同醉陶潛杯幽姿百種嬌風榭冷
艷千叢裊露臺此日共歌棠棣什伊予慙乏惠

連才

夜飲仲兄山莊

斜日携壺叩竹扉長公扶病倒荷衣避賢轉詫
交遊散樂聖休論世態非興劇酒隨紅燭盡狂
來歌逐綵雲飛中天月色真如畫不羨山陰雪
裏歸

許溪草堂爲朱天民賦

許溪新卜草堂幽况有漁磯枕碧流一徑榆陰
不知暑四窓山色更宜秋楓林散步吟紅葉水
檻閒凭對白鷗羨子高情同魯望筆牀茶竈只

扁舟

題陳職方魯得五山別業

嘗聞五老匡廬勝豈識閩中五馬山天外層巒
同縹緲雲端飛澗並潺湲蒼蒼秀色時當戶寂
寂幽棲日閉關何用拂衣遊五嶽羨君茲地足
躋攀

題孫秀才菰城別業

土城傳自春申築山館今爲武子居窓引溪雲
飛白鳥池通湖水浴紅蕖桑洲隱隱菰蒲亂樵
路迢迢竹樹踈羨爾投戈習文藝閉門讀盡鄴

侯書

送大司徒鄒公歸湖南

懇辭榮祿思田里竟解朝簪別
帝闈優詔特教馳驛去明時
何以拂衣歸兩都錢穀誰能計
八座功名世所希國有老成天下福
士人徒爾羨知幾

送戴孟光宰金壇

建業關河拱帝居金壇風俗類秦餘
華陽洞閔仙人錄句曲山藏太史書
鷄犬千家花縣靜絃歌終日訟庭虛
飄飄銀漢星槎去卧病文園

獨曳裾

送湯太史時敏謫官安慶

嗟君謫宦意何如僕馬星言畏簡書
江水遠浮天柱闊楚雲時傍小孤舒
每司簿領趨公府曾捧絲綸侍石渠
不久皇恩召宣室長沙無用弔三閭

送南仁父守徽州

三載西曹爲大夫金章象簡出皇都
使君五馬初乘傳漢室諸侯重剖符
春雪消時河水發亂山深處郡堂孤
知君不薄新安守訟簡風清一

事無

送人官南康

羨君作宦南康州廬嶽崔巍擁上流
瀑布銀河當面落香爐雲氣半空浮
江花自發匡君廟山月長懸謝客樓
幕下公餘倘無事爲尋彭澤菊
花秋

送人游洞庭

洞庭天險東西峙震澤波濤混太清
萬石雲霞開錦繡千林風雨雜簫笙
毛公壇下藏金籙鹿飲泉頭濯素纓
閉戶著書吾有意何時與子避

浮名

虜退二首

昨聞胡馬寇榆林今喜元戎奏捷音
選士防秋徵六郡出師終日費千金
風清細柳饒歌動月滿轅門殺氣陰
蠢爾匈奴猶未滅諸君宜軫濟時心

陰山西去草蕭蕭飛將誰能捉射鵬
當寧聞鼙思頗牧軍中投石望嫖姚
虎符夜發抽兵急羽檄晨馳轉餉遙
邊務即今彫敝極願將封事上清朝

山中寄履吉

千山萬山當面迎采秀探竒余獨行天寒洞庭
一水闊落日縹緲孤峰明草玄吾已欽前輩作
賦君今畏後生若問高陽舊徒侶竹林應有七
賢名

法華庵寄吳興諸友

昔愛湖山野寺居今依潯水借精廬陰陰橘柚
開虛館密密桑麻遶曲渠風土漸於鄉國近壺
觴無奈故人疎年來更有文園病媿似虞卿強
著書

度崑崙關寄馬侍御君卿

崑崙關外即邕州遷客那堪此地遊九折坂盤
疑棧道萬重山險抱江流時平不見干戈警身
病仍聞瘴癘愁五嶺古來無鴈到思君何處慰
離憂

答大司空劉公見懷

北雁南魚各異方吳江越水路茫茫人生聚散
那堪說世事升沉祗自傷十載東山間謝傳幾
時牛渚共袁郎相思獨上高樓望忽接新詩淚
兩行

宗伯昭過訪辱詩奉答

蓬戶蕭然仲蔚居忽傳高士駐文輿憐君失意
長爲客顧我窮愁強著書海內獨憐青眼在花
前猶恨綠樽虛石湖新水晴如練好買扁舟看
釣魚

答陳太僕魯南

金陵西望思悠悠苦憶風流老太丘對酒那能
論往事寄詩粗可慰離憂焚魚學士新招隱題
柱仙郎故倦游豈是窟身求負郭祇緣餬口卜
菟裘

答蔡丈九達

一自君王賜五湖閉門高枕著潛夫支離農
圃全踈嬾嘆息交游半有無金馬門高瞻日月
清楓江冷憶蓴鱸子雲白首真能事草得玄經
冠兩都

答履吉見懷

湖頭新水沒漁磯桑柘青青葉漸稀谿柳晚涼
蟬亂響渚蒲朝霽鶴群飛養生藥物身無恙玩
世功名事已非谷隱巖栖真我願異時浮海莫
相違

施憲副過宿列岫樓辱詩奉答

若谿惜別動經年吳地相逢倍黯然握手論心
疑夢裏狂歌痛飲對花前高樓只合元龍卧塵
榻寧於孺子懸本為情深遙命駕何須興盡便
迴船

奉次大司馬總督蔡公征黎二首

羽檄星馳出鳳城虎符風發集狼兵軍容坐撼
山川動殺氣先回草木生玉節臨邊蠻霧靜樓
船橫海瘴烟清朱厓此日封京觀麟閣他年勒
姓名

交南新築受降城海外親提十萬兵專闡功高
推大將請纓心壯笑書生轅門風急朱旗捲幕
府霜寒盡角清露布早馳黎母捷磨崖誰數伏
波名

次電白觀海

電白城高海上開飛樓千尺俯蓬萊三山隱見
從空起八極溟濛入望來蜃氣朝蒸疑是霧潮
聲晝湧忽如雷遙思驅石當年事直欲乘槎去
復回

次遂溪書事

荒村古堞樹陰陰下馬停車試一臨城郭蕭條
經戰後山川搖落對秋深劉琨報主聞鷄舞諸
葛匡時抱膝吟北虜南蠻憂不細江湖空有廟
廊心

次文太史見寄

愁緒搖搖似旆旌每懷前輩有儀刑高公詩寄
題人日方朔名傳是歲星吳苑菊荒三徑在楚
江雲遠數峯青折腰五斗綠何事休怪楊雄憶
草亭

袁永之集卷之七

袁永之集卷之八

五言排律

南都紀遊

元正聽朔奉天殿

廷對

入館呈諸君

寄壽太傅木齋謝公三十韻

紫陽菴

張氏園亭

遊張公洞簡宜興令谷嗣興

答谷嗣興游虎丘見憶

自夏徂秋候 旨未得歸

南嶽登絕頂

送張濂卿歸賦溪

送莫水部子良歸華亭

賦得桃花洞贈李正父

七言排律

寄上大宗伯石潭汪公

桂林卧病書懷

秋菊盈園客至輒醉效白太傅體作

五言新體

江都陳娥許嫁姑蘇崔生強暴將奪之抱
節而死二首

六言

莊居二首

春日肆志園漫興五首

石湖次彭孔加韻

芳春樓

飛麗亭

寒玉泉

袁永之集卷之八

南都紀遊

六合齊文軌多方協帝猷山河包魏闕日月拱
神州佳氣瞻閭闔光華憶冕旒樓臺三輔曉風
物五陵秋財賦東藩會網維北極侔寢園橐矢
服武衛擁貔貅地接王公館花迎伎女舟通衢
分列騎官柳引鳴騶濟濟來陽禹彬彬奮祖劉
威儀方陋漢制作遠追周

元正聽朔奉天殿

宵炬開閭闔晨鍾警未央穆清頒象魏斧袞翼

旂常庭實輸文陛官縣合洞房鸞和瞻至止獸
舞儼成行土德三元會乾文七曜光履端申歲
事敬授稟王章協律調玄籥司儀肅袞裳春融
仙掌露寒薄玉戈霜銅渾初昏轉階萸孟月芳
苔痕疑隱綠柳色半舒黃綵帖鏤金薄椒花薦
羽觴雲官歌萬壽太皞肇東方靈沼流澌釋新
田土脉張九衢揚木鐸千畝勸公桑翼翼宸維
正巍巍帝座昌都俞欣道泰游豫悅時康

廷對

警蹕臨軒出公車待詔來羽林羅廣陛法從擁

蓬萊天語絲綸密人文日月開非熊勞夢寐調
鼎想鹽梅喜起夔龍會條陳董賈才小儒真忝
竊拜手咏康哉

入館呈諸君

卒業銅龍署從游金馬門吹噓忝嘉薦感激荷
殊恩朝散花迎珮公餘月滿軒槐陰親几席鶴
舞對琴尊竊祿多遊豫披文共討論諸君盡材
彥述作冠詞垣

寄壽太傅木齋謝公三十韻

翊運調樞軸乘時陟廟廊四朝全禮數八座冠

班行名使華夷重功存社稷康鍾彝標事業甲
第聳文章玄化思弘治明公佐 敬皇披鱗輸
骨鯁補衮詠羔羊侍從雲臺下逶迤黼座傍謀
謨勤獻納夙夜慎趨蹌坐視金麻草歸含玉署
香建明真不朽遭際亦非常共羨時宣召惟知
日贊襄休休綿國脉肅肅布王綱剝復機相倚
艱屯意叵量悲風天地慘遺詔古今傷萬事俄
然改孤忠誓敢忘危機嘗虎口正色忤豺狼幸
遂明農願終傳辟穀方斯文關泰否吾道卜行
藏謝傳東山墅裴公綠野堂升沉更世代盤錯

歷風霜訪落勞存問徵書荷寵光安車迎再四
束帛備玄黃虛位相推讓趨朝勉對揚主恩來
不忝臣節去彌芳明哲身能保林泉志竟償羽
儀尊泰華桃李望門墻世祿誇名閥詞林有令
郎伊余蒙品藻美烈媿鋪張未及陪珠履徒懷
奉羽觴佇瞻南極下遙祝壽無疆

紫陽菴

復磴上重重靈關訪赤松壇危瑤草合竈廢白
雲封珠舄懷賓馭星旌想道蹤丹砂難變化紫
汞費陶鎔海上方無驗桃源路莫從何當棄家

室緱氏倘相逢

張氏園亭

未窮游覽興延賞辟疆園戚里聯閭闔椒房冠
掖垣遡風排繡闥納月啓華軒芳沼芙蓉列幽
庭翡翠翻鶯花疑杜曲水物愛桃源歸騎林塘
晚昏鴉樹樹喧

游張公洞簡宜興令谷嗣興

靈洞虛窓豁香臺曲磴連陰陽開福地日月闕
人天度險高還下探竒折更旋浮嵐迷晦黑怪
石駭騰騫色雜丹青飾形疑鍾磬懸把杯承乳

溜張炬認芝田羽化窮幽訣霄昇想秘詮寶符
何在矣丹竈尚依然浩蕩歡方洽飄飄思入玄
因懷葉縣宰鳧舄望翩翩

答谷嗣興游虎丘見憶

仙宰鳴琴暇旃林駐節遊河山標上界物序賞
初秋遐眺憑危閣高攀陟峻丘花迷芝蓋轉泉
涌羽觴浮陰壑碑文蝕玄宮劍氣流霸圖還憶
古勝槩屢窮幽錦札勞題贈瑤麾阻獻酬無緣
同惠遠送汝虎溪頭

自夏徂秋候 旨未得歸

徂暑慙流滯何時許罷歸過湘無鴈到望闕有
魂飛拙宦心真懶傳經事已非周任稱就列梅
福嘆知幾瘴癘炎州劇尊鱸澤國肥江湖隨處
好早晚築漁磯

南嶽登絕頂

南嶽勢何雄高高聳祝融目窮三楚盡身在九
霄同雪瀑懸銀漢星梁跨綵虹古臺朝望日陰
壑晝乘風虞狩遺踪杳仙昇往事空坐觀飛雨
至雲氣起封中

送張濂卿歸賦溪

長聞賦溪勝何日五湖游山指洞庭去水從天
目流草荒嚴子墓橋泊范公舟錦浪迷紅芰清
波戲白鷗菱歌花裡出畫槳鏡中浮君去秋應
盡霜楓滿渡頭

送莫水部子良歸華亭

華亭生二陸之子熟三墳月露早今體陽春慕
古文清逾何水部俊掩鮑叅軍錢穀寧勞汝林
泉獨見君告歸辭紱冕消暘卧松雲海上方堪
試天台藥可分丹砂延壽命竹素累功勳玄草
如刊定魚箋好寄聞

賦得桃花洞贈李正父

聞子幽棲處桃源路不迷崇臺窺鷲嶺別業對
花溪竹樹攢危壑烟霞斷石梯桑麻墟里接鷄
犬白雲低中有長生客金丹竈已泥他年問津
去相訪武陵西

寄上大宗伯石潭汪公

高卧東山老秩宗懇辭榮祿遂明農丹心魏闕
孤臣淚白首江湖萬事慵侍從三朝真感激官
居八座亦遭逢美名久矣人爭慕直道由來世
不容薊北周南雲杳杳吳山楚水路重重鴈歸

彭蠡知何處家住匡廬第幾峰棠棣花前紛屢
舞鵲鴿原上喜相從市朝莫問多更改兄弟遙
應盡友恭未及識荆瞻氣象曾因御李荷陶鎔
佇看瑚璉登清廟莫學神仙事赤松

桂林卧病書懷

南中春半已飛花客裏傷春更憶家舊說炎荒
惟象郡今來卑濕倍長沙山嵐弄雨初疑霧海
氣披晴忽變霞杳杳蒼梧分嶺外迢迢銅柱極
天涯殊方物候偏驚早到處夷風未慕華月報
峒蠻騷戍堡時傳江獍劫鹽楂投戈共喜交州

順游釜猶嫌荔浦譁
遠道甲兵愁阻絕
羸軀疔瘡苦交加
折腰元亮辭先賦
病肺相如思轉賒
鼓柁新秋還甫里
杜門終日卧官衙
葺鱸自足供饘粥
蕙苾休教載使車
莫恠掛冠胡太早
二毛無意戀烏紗

秋菊盈園客至輒醉效白太傅體作

小園無日不花開
更喜黃花滿徑栽
謝病長卿拋著述
避人陶令賦歸來
霜枝高下依朱檻
露蕊浮沉薦羽杯
日引兒童相燕賞
時邀鄰曲坐莓苔
香氛似入芝蘭室
叢艷爭看錦繡堆
豈羨

季倫金谷好已拚
李白玉山頽酒中
深趣真堪樂身外
浮名祇是災但使
有花無俗客百年
知醉幾千廻

江都陳娥許嫁姑蘇崔生強暴將奪之抱節而死二首

生存異鄉縣死逝異墳
丘單鳧違昔侶隻鳳失
今儔願結來生誓還同一處遊

妾顏花比豔妾命草同彫
寶幔空塵積泉臺詎恨銷
貞魂應不散暮雨復雲朝

莊居二首

百疊山圍屋角一灣水繞門前試問橫塘風景
何如灑西輞川

避客誅茅山郭養病却掃衡門焚香終日靜坐
荷鋤有時灌園

春日肆志園漫興五首

一瓢逍遙農圃千駟笑傲王侯尼父從吾所好
於陵與世無求

粉牆綠垂楊柳溪水紅映桃花山店酒旗高颺
江津漁鼓頻搗

床頭濁酒初熟園裡好花競開莫笑潘郎拙宦

偶同陶令歸來

梨花一番細雨戴勝百轉和風白白新鶯戲水
雙雙舞蝶穿叢

風顛雨橫無賴花落花開不知忽見簾櫳新燕
忍看庭院殘枝

石湖次彭孔加韻

秀嶺雲藏鳳刹澄湖月偃虹梁風帆遠隨落鴈
漁網高掛斜陽

芳春樓

花氣遲遲春晝花陰寂寂春宵素女臺前掛鏡

玉人樓上吹簫

飛麗亭

朱拱春鶯對轉繡簾朝燕雙飛借問蘭亭綺麗
何如金谷芳菲

寒玉泉

千挺琅玕濯雨四簷環珮鳴風湘簟不知炎暑
北窓高卧誰同

袁永之集卷之八

袁永之集卷之九

五言絕句

號州許氏園亭雜詠十三首

堯峰山十二詠

橫塘別業十四首

肆志園

橫塘歸

返照

野步

渡江浦

登月華洞

興安道中

迴鴈峰作

黃陵廟

送人官曲阜

西蘆辭三首贈上海諸徵君

並頭白菊

與諸文學分韻得頭字起萬字止

袁永之集卷之九

號州許氏園亭雜詠十三首

柳溪書屋

高柳蔭清溪烟霞閉茅屋中有科斗書奇字不可讀

賓山草堂

山色晨昏殊彩翠紛千狀呦呦雙鹿麕交臥青苔上

雪岫

危崖綴陰洞窈窕藏曲折洞裏黃精花六月含

霜雪

蜡祠

九月禾稼登十月場圃築坎坎蜡鼓喧爭唱迎
神曲

松麓

傍麓羅古松松根多赤苓月下松子落有客誦
黃庭

方橋

稻畦通竹逕水磴激花渠盡日濠梁上清流數
儵魚

曲塘

別墅抱迴塘水竹多幽趣白鷗飛復來灌園忘
日暮

延月亭

微雲澹絳河初月輝輝出素影照青林幽人坐
石室

花嶼

疊石為魚防花卉羅奇異春風三月時花落游
魚戲

釣臺

溪水清漣漪溪毛紛可數竟日垂釣竿得魚長尺五

蔬圃

蔣植學爲圃拮据人不知山中酒新熟客至烹露葵

竹園

幽篁密復踈雨餘色蒼翠天風振崇林環珮聲相類

葦浦

蒹葭蔽極浦瑟瑟含秋風夜聞滄浪歌知是河

上公

堯峰山十二詠

半峰亭

連峰翠岌堯孤亭半峰上山下雲起時翻向憑高望

清暉軒

樹杪見風帆正對南湖水山月流清暉來照軒窓裏

碧玉沼

泠泠碧玉沼青萍鋪水面風吹萍葉開水底魚

皆見

觀音巖

復磴轉危巖寂寥古龍象空林人跡稀但聞清
磬響

白龍洞

陰洞山之阿谿砢石勢逼還疑蟄龍起雲霧閉
深黑

多景巖

應接無閒暇日與賞心遇惟應山中人解識山
中趣

寶雲井

古甃浸寒泉稚子時時汲迎晨入翠微嵐氣侵
衣濕

偃蓋松

高松若車蓋偃蹇北山隈不蒙匠石顧詎識明
堂材

鐵塔

鴈塔蔽浮雲縹緲人天外風鈴鳴四簷獨徃聞
幽籟

妙高峰

透迤羣峰首躋攀與何已曠然心目開盡此丘壑美

東齋

楓葉紛紛落荒徑無人掃萬念杳虛寂閑門閉
秋草

西隱

朝坐東齋幽夕宿西齋靜跏趺對佛燈沉沉清
夜永

橫塘別業十四首

有引

余別業在橫塘頗有黃山石湖之勝

辱文內翰徵仲題其門曰宅近青山

同謝眺門垂碧柳似陶潛爰即所題

賦十四絕句

宅字

伊余性好靜移家黃山側黃山何逶迤正近幽
人宅

近字

山居遠城市更與石湖近石湖妙難言秋來水
如鏡

青字

連山何青青四圍如畫屏清風敞高閣明月懸
廣庭

山字

地僻罕人事日長唯閉關扁舟時汎湖雙屐還
登山

同字

自余爲老農事事田夫同食也百畝田居也一
畝宮

謝字

衣食一無營朝市兩相謝守寂聊自娛山中日

多暇

眺字

山樓頗高明豁然宜遠眺開襟當雄風懷古一
長嘯

門字

青山旣遶舍綠水還當門即此足避世何用尋
桃源

垂字

經月不出戶下簾終日垂危坐誦老易逍遙澹
無爲

碧字

空堂寂無喧落葉疑人跡秋深涼思多雨洗苔花碧

柳字

臨水植芙蓉綠隄列楊柳愛此芳樹陰風雪亦何有

似字

雙鶴皎如雪時有凌雲志惟應考槃者高潔性相似

陶字

濁酒一壺罷其樂何陶陶仰天雙耳熱且復鋪其糟

潛字

卜築歲已淹耕讀時相兼丘園自有事還著老夫潛

肆志園

折腰元亮懶肆志魯連迂絳組從他慕田園且自娛

橫塘歸

片月出雲嶠荒烟起茅舍薄暮見漁舟來集澄

潭下

返照

返照射空潭千林亂蟬響幽獨悵誰語徒倚孤亭上

野步

新月生西嶺窈窕穿叢薄林深不逢人時有松子落

渡江浦

閱武乘春令揚帆及霽晨柳烟迷極浦花日蕩芳津

登月華洞寄潘臬諸公

晨登月華洞洞口雲微微桂嶺杳何處孤心雲共飛

興安道中見杜鵑花有感

杜鵑啼已老杜鵑花尚開昔從此山去今見此花回

廻鴈峰作

北鴈不南去南人今北歸故鄉愁尚遠欲與鴈同飛

黃陵廟

日落黃陵廟潮生青草湖蕭蕭斑竹裏山鬼嘯
相呼

送人官曲阜

花發潘生縣風清宓子琴君行瞻孔廟絲竹有
遺音

西蘆辭三首贈上海諸徵君

君家滬瀆城城西蘆子渡蘆子何蒼蒼秋風吹
白露

秋鴈集復飛寒潮明更滅日暮風起時蘆子花
如雪

空江不見人漁舟眇何處風吹蘆子鳴颯颯似
人語

並頭白菊

白菊白如雪雙花一蕊開遙疑兩素女乘月舞
瑤臺

與諸文學分韻得頭字起萬字止

頭白不再黑持觴須自勸圓魄幾盈虧世慮徒
千萬

袁永之集卷之九

袁永之集卷之十

七言絕句

皇太子生肆赦五首

燕京上元歌四首

金陵歌十首

太平堤

峴山歌十二首

桂嶺十首

自靈巖至西洞庭山四首

北湖

望縹緲峯懷蔡丈九達

觀音巖訪楚石和尚

恭和棗陽王夏日襄陽歌三首

答大司空劉公二首

少宰徐師薜荔園十四詠

送汪僉事赴湖南三首

送文太史徵仲歸田五首

送蔡師古遊漢陽

送人還臨海

送人遊武當

送許彥明還金陵

送陳道原武舉北上

劉司空宅觀趙王孫所畫逸驥脫羈圖

石湖草堂芭蕉甚盛賦詩乞之

紹之弟惠麝香百合千葉梔子二首

春來無日不飲爲酒所困乃不知春去悵

然有述二首

溪上作

袁永之集卷之十

皇太子生肆赦五首

海內歡傳出 聖人萬方雷雨一時春元良繼
體傳千葉宗祏開祥自九嬪

電繞青宮瑞靄流星輝紫極慶雲浮多男不用
高禔祝淑女還同太姒述

天祚皇明曆數長我 皇純孝格 高皇震索
已符文母卜河清先肇啓賢祥

冕旒朝御奉天門拜舞羣趨賀 至尊告廟禮
成書玉牒垂衣端拱法乾坤

彤樓放赦跪千官爭看金雞丈五竿馳詔分頒
諸道使覃恩均洽萬人歡

燕京上元歌四首

九陌烟花遶建章春城游冶鬪新粧處處寶燈
疑不夜家家歌管類平陽

火樹千枝照掖庭魚龍百戲雜優伶樓頭綺綵
懸明月地上金蓮布曉星

侯家邸第入青雲一曲笙歌十里聞花作瓊瑜
金作埒燕姬月下舞羅裙

紫陌香塵蹴踘回紛紛花霧踏歌來太平無事

都行樂魚鑰彤樓徹夜開

金陵歌十首

金陵定鼎開基地虎踞龍蟠王氣多旁枕赤山
爲曲阜外連江水作黃河

高帝龍飛自鳳陽金戈直指掃天狼親驅虎旅
收姑孰更遣舟師取豫章

首起塗山作沛豐轉漕江左類關中長驅已報
崑函破略地仍傳瀚海空

地轉天旋大駕崩千官灑淚哭龍昇翠華玉
鳥虛無裏日暮悲風起孝陵

一自 文皇宅北平漁陽上谷衛都城西通關
陝爲藩鎮南指金陵配鎬京

別寢靈宮構紫微嚴更清署秘端闈花開舊內
無人見草綠長門燕子飛

海內風雲盪晦冥空廊寂寂闕丹青麒麟閣上
圖諸將玄武湖頭扈百靈

花發臺城苑殿荒六朝遺事使人傷翠華想像
宸游處碧草萋萋輦路長

岸夾垂楊起畫樓秦淮錦浪接天流朝朝綵鷁
來江口夜夜蘭燈集渡頭

廣陌香車九軌來長千里接鳳凰臺烟花萬戶
聞歌舞宮殿千年閉草萊

太平堤

菱葉荷花夾岸秋金堤十里抱芳洲鳳凰臺對
蓬萊殿玄武湖通太液流

峴山歌十二首 有引

吳興山水郡也而峴山爲最勝前臨
碧浪湖中有浮玉道場金蓋洞庭弁
嶺環竒拱秀且近城而幽臺榭紛錯
竹樹廻旋余甚娛之旅寓旣久得十

二絕句

峴山更比襄陽好漢水何如碧浪清千里桑麻
環沃壤萬家樓館抱重城

城外茗溪接雲溪道峰高並弁峰齊誰言剡曲
和巖瀨莫羨藍田與灤西

春水桃花綠映人曉烟楊柳萬條輕歌船合沓
晴湖戲游騎聯翩綺陌行

金蓋茗蕘插紫霄洞庭雙峙駕靈鰲具區不數
三江險天目還同五嶽高

浮碧亭前瞰碧漪窪樽石上倒金卮叢祠尚表

三賢惠碑勒長存叔子思

三月桑洲綠漸勻千村蠶種浴溪濱賣葉爭看
趨市客攀條時見挈筐人

浮玉山浮碧浪湖鷺絲白白間花鳧鱖魚潑刺
金銀躍菡萏紛披錦繡鋪

蘇灣山下竹連岡學士墳前臥石羊牧豎採薪
爲野燒漁人吹笛起滄浪

紫荇青蒲密復稀水清花落鱖魚肥曬網朝朝
漁艇集採菱處處渡船歸

說法空尋最上乘緇經靜對佛龕燈前身恐是

王摩詰今世來爲有髮僧
黃菊丹楓照眼明山青湖碧愛秋晴夜坐南樓
看月上曉開西閣候雲生
梵殿香臺竹樹間風檣雲纜寺門前客館不知
黃葉落書窓惟有白鷗眠

桂嶺十首

有引

城西鳳凰峴下有范氏園桂樹數百
株花時游客如市嶺西更有魯家園
樹小而花更繁人無遊者

千株古桂窳屯雲數里香風隔塢聞翠幕周圍
高復下亂飄金粟碎紛紛

華麓山前繞稻田鳳凰峴下桂叅天村童野老
盈筐採賣與遊人不論錢

繡褥文茵席屢移羽觴催送酒淋漓戲將紈扇
承花朵醉脫羅衣掛樹枝

風舞飛英杯面浮酒香花氣紫霞流綵囊盛滿
懸衣帶更雜鈿蟬插髻頭

緩步松陰過嶺西嶺西叢桂蔽迴谿野人落帽
低枝亞稚子携壺小徑迷

魯園花較范園多谿水當門覆薜蘿莫學桃源

賺劉阮向來遊客少經過
偃蹇虬枝玉露溥清秋仍得醉中看若教朗月
臨青嶂何用乘風向廣寒
錦繡山河拱地靈黃金堆裏擁丹青恍疑戶掩
流蘇帳又似堂開雲母屏
日落深林客漸稀傾城士女看花歸香塵不斷
人聲遠惟見籃輿轉翠微

白靈巖至西洞庭四首

靈巖雨處是琴臺舞榭歌梁已草萊西施洞指
雲中出范蠡舟從海上來

龍爭虎鬪事千秋越壘吳宮麋鹿游更分震澤
爲彭蠡亦有三江賽十洲
天開地缺浸方輿漭漭波濤混太虛縹緲峯頭
看浴日毛公壇下闕丹書
七十二峯天削成青蓮萬朵畫分明若爲飛鳥
都游遍不減蓬萊頂上行

北湖

樹裏茅堂面太湖水精宮闕對蓬壺晚來雨霽
開簾看七十二峯如畫圖

望縹緲峯懷蔡丈九達

遙望中湖縹緲峯丹霞削壁幾千重桃花曲曲
緣源路我欲從之訪蔡邕

觀音巖訪楚石和尚

聞有高僧住翠微雨中來訪白雲扉空山落葉
無人跡但聽泉聲百道飛

恭和棗陽王夏日襄陽歌三首

漢水方城帝子宮玉臺瓊館五雲中自有舜絃
消永日不須班扇引薰風
習池肅穆疑氷井峴首陰森似雪山倒着接羅
花下醉銅鞮滿路踏歌還

荷花如錦柳千絲暑殿清虛坐奕棋便儼襄陽
爲閨苑更誇仙子是陳思

答大司空劉公二首 有引

大司空劉公以七夕中秋重九日三
訪予於峴山法華寺予方觀潮浙江
皆不相值辱題二詩於法華壁上敬
此奉答

自嘆身如不繫舟乘桴放浪五湖遊秋來欲問
行藏處黃葉僧房對白鷗

七夕中秋獨舉杯重陽誰與共登臺觀潮自向

錢塘去訪戴空勞剡曲來

少宰徐師薜荔園十四詠

薜荔園

七十二峯浮五湖崦西山水賽蓬壺
輞川金谷聞人說薜荔園中即畫圖

思樂堂

高棟層軒勢欲飛夜臺冥漠掩泉扉
昔人行樂今人憶只有空梁舊燕歸

石假山

山生花石石成山幻出峯巒几牖間
不是五丁

神斧鑿何緣三島愜躋攀

水鑑樓

空明潭水映朱樓秦女吹簫在上頭
夜半素娥開寶匣一輪明月掛中秋

風竹軒

仙家軒館極清幽踈竹千竿翠欲流
自有冷風驅鬱暑翻疑長夏似深秋

蕉石亭

太湖花石玉玲瓏更愛芭蕉弄晚風
坐久一亭雲影亂綠陰浮動酒杯中

觀耕臺

綠野風和暑氣清東菑農作喜新晴食力豈慙
徐孺子登臺親課隴頭畊

薔薇洞

密葉繁枝結洞房萬紅千紫鬪春粧莫教一日
無歌舞錦繡叢中醉幾場

荷池

草閣虛無俯碧沙清池綠水出蓮花風翻翠蓋
傾珠露日射紅衣暈綵霞

栢屏

編蓬爲戶栢爲屏黛色蒼蒼四序青蔣逕不除
無客到閉門終日草玄經

留月峯

峯形如月影參差霧縠冰輪隱半規不用班姬
將扇比祗疑張尹畫娥眉

通泠橋

泠泠山礧響松風絕壑雲深一徑通此去赤城
知不遠石梁天上掛飛虹

花源

春盡清溪泛落花中湖別自有烟霞武陵未必

如西崦雞犬桑麻邑萬家

釣磯

片石湖心作釣磯投竿終日坐忘歸晚來處處
漁歌起醉看青天白鷺飛

送汪僉事赴湖南三首

曉發匡廬泝武昌輕舟幾日渡潯陽清楓兩岸
啼猿夜黃鶴樓頭望故鄉
鄂王城下漢江流衡嶽雲連夢澤浮九月清霜
飛木葉一聲陽鳥使人愁

分司憲府鎮荆蠻皂蓋朱幡杳莫攀倘過襄陽

問耆舊何人高臥鹿門山

送文太史徵仲歸田五首

劉向爲郎已十年賈生憂國竟南遷嬾從天祿
成玄草寧向柴桑乞酒錢

明光殿前辭紫宸黃金臺下送行人長淮風浪
多新水茂苑鶯花已暮春

五十傳經試一官誰能徇祿不如閒偶來金馬
承丹詔焚却銀魚向碧山

豈有移文勒北山灌園終日不辭艱三花少室
惟高臥五柳衡門早閉關

燕京二月梨花飛澤國春深鱸鱖肥相如四馬
臨邛去范蠡扁舟湖上歸

送蔡師古遊漢陽

漢江鴨綠與天通一日飛帆向楚中峴首斷碑
懷叔子鹿門高枕慕龐公

送人還臨海

南游會稽北入燕看花長醉酒壚邊輕舟杳杳
望吳越秋水鱸魚時扣舷

送人遊武當

洞庭南去即三湘衡嶽盤空接武當雲覆龜蛇

長五色下生芝草與琳琅

送許彥明還金陵

霏霏雨雪滿江湖雲外哀鳴鴈影孤歸到金陵
親友問松江惟有四鯁鱸

送陳道原武舉北上

少年能武復能文此去須空冀北群投筆封侯
豈難事手擒胡虜獻明君

劉司空宅觀趙王孫所畫逸驥脫羈圖

誰寫驕驄意匠深幸辭羈勒就長林雖無滅沒
追風相猶有騰驤歷塊心

石湖草堂芭蕉甚盛賦詩乞之

苦憶楞伽舊草堂芭蕉幾樹綠雲長遠公解識
山人意分得清陰映粉墻

紹之弟惠麝香百合千葉梔子各二本
碧玉亭亭縞素粧朦朧斜月轉山房天香國色
真無比麝腦何須賜尚方

百合花殘薜蔔開殷勤移向藥欄栽最愛濃香
清潯暑那知三伏與黃梅

春來無日不飲爲酒所困乃不知春去
悵然有述二首

春來日日昏昏醉不是登山即泛湖中酒朝眠
猶未起却嫌門外客携壺
落盡桃花滿綠波不知春去恨如何驅愁無計
還憑酒莫厭高陽酒伴多

溪上作

清溪曲曲泛飛花千樹緋桃爛曉霞何必武陵
堪避世橫塘自有許由家

袁永之集卷之十



袁永之集卷之十一

賦頌

遠遊賦

思歸賦

弔董相賦

懲咎賦

宣幽賦

北征賦

潛思賦

閔俗賦



西征賦

別知賦

秋水亭賦

麟山賦

中麓賦

陝西諸將破虜頌

河清頌

皇太子生頌

袁永之集卷之十一

遠遊賦 有序

余弱冠登朝讀書中秘繼官刑曹調武選武庫
災編戍湖州赦歸蒙薦起爲南武選遷職方署
員外郎尋有廣西之命昔孔子欲居九夷不以
爲陋廣西古百粵也今海內同軌且余旣仕矣
安敢以遠辭乎爰作遠遊賦以述事抒情焉其
辭曰

沐鴻私於嘉運兮擢遺仄於樊丘曳華綏以登
進兮踐舊京而嬉遊幸朝野之無事兮肆驩虞

而靡憂謝文墨之填委兮稽圖牒以諮搜差穀
旦以休息兮爰嘯侶以集儔升北山以遐眺兮
遡大江而榜舟或閱武於廣場兮或被袂於清
流尋廢興於六代兮仰駿業於皇猷念無荒
之有戒兮信佚樂而不偷乏佐時之奇畧兮竟
投裔于僻陬駭顏駟之龐眉兮恠馮唐之白首
嘆滯淹於更生兮笑浮沉之楊叟羞子安之巧
宦兮蒙良史之譏醜偉潘仁之拙政兮賦閒居
而不朽衆捷徑以窘步兮固余顏之所厚獨脩
媿以委順兮諒余心之所取苟貪婪以競進兮

寧坎壈以自守昔孔聖之周流兮居九夷而弗
陋下惠之直道兮遭三黜而無咎顧樗櫟之非
材兮雖棄捐其何有奉簡書以畏忌兮戒僕夫
而啓行出樵李之下邑兮游臨安之故城痛越
霸旣不終兮宋社又以圯崩肅陽侯以先驅兮
遵淞水以揚舲感錢鏐之雄武兮提尺劍以縱
橫悼伍胥之忠憤兮浮鷗夷以隕身忽怒濤之
山立兮儼白馬以耀靈沿桐江以容與兮憇巖
瀨之澄清躡高臺以長嘯兮懷哲人之典刑於
是芳歲將徂玄冬告畢雨蒙蒙其下淫兮雪霏

霏以蕭瑟露霧暄以冥冥兮同雲曖其無色鴈
離離而南翔兮日忽忽其西匿坐脩夜之難旦
兮步列星以太息繹甯越之曩歌兮材士頗領
而失職心侘傺以紆軫兮思絪結而瞽惑水泉
涸其不流兮石巉巖而阻塞旣儻偈以川浮兮
復崎嶇而山陟野蕭條而無人兮獸躑躅以屏
跡愁車殆而馬煩兮汨吾朝征而夕于役形枯
槁以渴饑兮精消鑠而內蝕菟涸養以踰佚兮
涕浪浪而霑臆撫壯年之不居兮耻脩名之未
立於是歷甌粵觀豫章此古嶧閣於江渚兮

詠瑋辭以徬徨帝子不可作兮王生亦已淪亡
睇彭蠡之巨浸兮追鴻伐於高皇想湖水之
盡赤兮殪元兇於大黃翦鯨鯢於溟渤兮陋巨
鹿與昆陽謁群忠於叢祠兮覩丹青之耿光甄
孫許之壯烈兮實後先以相望咸致命以竭節
兮終身滅以名揚越臨江以信宿兮矚玉筍之
崇岡侈降禪於漢武兮欽登封之闕藏忽獻歲
以發春兮迴青陽於幽谷鳥嚶鳴其相和兮麗
冬榮之嘉木悲去鄉其日遠兮時反顧以蜷局
魏牟皇皇以戀闕兮嗣宗塗窮而慟哭何賢哲

之達觀兮猶委心於榮辱諷龍蛇之至言兮勵
浮雲以自勗聳韓廟於表疆兮哀逢辰之不淑
黜百家以述聖兮排二氏以箴俗雖馴經以開
雲兮卒罹殃而粵結賦逐弔楚纍於江潭兮披
騷經而三復椒蘭楚而楚兮嫉蛾眉而謠詠
怨靈脩之不化兮楚之傾覆式彭咸以自
靖兮葬汨羅之魚腹涉長沙以夙駕兮嗟賈生
之天年遭漢文之殊遇兮何卒困乎絳灌之巧
言闢宣室以徒召兮賦鵬鳥而自憐挺異才以
命世兮竟賣志於重泉亂衡陽之洪河兮厲沅

湘之大川覽吳楚之上游兮極耳目之偉觀瞻
柳侯於永郊兮薦繁蔭以羞筵世溷濁而壅塞
兮紛妬忌以蔽賢慨四子之一轍兮羗異代而
同患士不遇以永歎兮諒自古而已然望朱垠
以傲裝兮指象郡而驤軌肆流目於南疑兮悵
重華之野死蒼梧曼曼以在望兮悼二妃於江
之汜山龍從以造天兮嵐昏昏而晝起桂樹叢
生於巖阿兮春炎炎其若暑壤濱海以沮洳兮
土墊濕而恒雨猥狃娛以伺人兮咸雕題而黑
齒蝮蛇綦綦於中林兮蜚含沙於淵水雄虺九

首以鬻鬻兮封狐捷而千里何此邦之炎瘴兮
固蠻族之所止徵禹跡之所不到兮檢職方而
未序詫漢帝之喜功兮肇開拓而疆理猗皇風
之泰昌兮界昆吾以爲宇包五嶺以作藩兮括
百粵以置吏朝越裳以重譯兮撫交州而即叙
眇余躬之陋微兮敷文教于茲隅戾泮宮以振
鐸兮選青衿之秀儒懼聖遠而言湮兮病曲學
之支離列四科以作人兮愧五教之未施憑丘
墳以頤志兮寄絃歌以自娛聞老聃之適戎兮
講道德之玄虛蒙莊適于漆園兮馳放言以恣

睢虞卿窮而亡聊兮猶發憤以著書苟斯文之
未喪兮竊希志於前規吾將籠今古以騁鶩兮
掇罔象之玄珠亂曰去鄉遠遊心不樂兮自冬
徂春將焉薄兮炎州卑濕風土惡兮魑魅晝出
瘴癘作兮狐死首丘不忘故兮代馬北風尚知
慕兮世不我知羗誰愬兮歸歟歸歟娛竹素兮

思歸賦

旅荒徼以羈處兮心忡忡而多憂陽春逝以流
邁兮曜靈迅馳而不留涉恢台之炎夏兮赫焦
灼以鬱蒸瘴暄暄以中人兮觸沉疴以驟興寒

熱搏而襲逆兮苦疢崇之相乘乏單豹之內養
兮二豎伏而伺升哀吾生之孔艱兮逢百懼以
備嘗進觸藩以跼踖兮退曳尾而摧藏嘉魯連
之肆志兮雖貧賤其何傷世好朋而習佞兮思
婞直之構殃遯幽谷以逾紀兮忽奔走乎遐方
豈好爵之我縻兮實簡書之可畏收孟明於三
北兮蒙羸繆之渥惠奉周任之炯戒兮勉陳力
以就位冀鉛刀之一割兮庶伐檀之無媿老冉
冉之將至兮疾疢糾其相仍俟河清之幾時兮
恐朝露之易零誦夫子之雅言兮疾沒世之無

稱紛王事之鞅掌兮籲天闔而乞身積頽思而
寢息兮憎愠倫以休惕喟中情之莫我察兮眷
懷歸而未得夜申旦以不寐兮就角枕而反側
蟲蕭蕭以潛飛兮聽空除之蟋蟀先秋氣以哀
唵兮感時物之數易魂營營以夢歸兮覩故鄉
之髣髴歛驚寤以在床兮怛懍懍而愁愁昔鍾
儀之囚晉兮操土風而不忘彼莊舄之仕楚兮
詠越聲以徬徨覽季倫之奏引兮思娛老於河
陽繹陶令之賦辭兮脩初服於柴桑人情各懷
土兮豈必經營乎四方余既不能狗華以苟祿

兮又焉能棲棲於此邦孔接浙以違齊兮軻濡
滯而出晝欽疏傅之炳幾兮晚桎梏於組綬梁
歌噫以竄稽兮梅掛冠以遜吳仲樂志於園藪
兮張興思於蓴鱸鴻冥冥於寥廓兮超繒繳而
遠徂非斯人其誰與歸兮永逍遙於江湖亂曰
玄鴉黑鳥號寢宮兮鳳凰翩飛匿林中兮人各
有心紛不同兮靜躁殊趣貴中庸兮塊獨居此
將安從兮我思古人希哲蹤兮

弔董相賦

江都有董相祠焉余謁而悲之作賦以弔其詞

曰余有事于江都兮敬謁董相之故祠悼哲人
之遐烈兮獨慷慨以申辭何夫子之純懿兮生
不逢夫休時黃虞日遠兮禮法敗衰弦歌不陳
兮譎詐相欺秦肆并吞兮燔燒書詩周孔道墜
兮異說恣睢漢興馬上兮陋習未除叔孫小器
兮又何制作之能為猗夫子之中庸兮卒潛心
於下帷綜羣籍之華實兮宣六藝之精微躡游
夏以升堂兮抗孟荀其並馳發奧義於天人兮
王道粲其綱維彼武帝之多慾兮徒仁義之外
施表章經術兮何獨棄此大儒豈斯文天喪兮

實公孫其蔽之兩相驕主兮匡王禮儀虎口幸
脫兮終身擯遺貪人敗類兮讒言罔極忠信弗
臧兮仁賢杜塞悲士不遇兮撫遺文而太息蓋
自古已然兮士入朝而見嫉駑馬充棧兮騏驎
困於下勒幽莠盈疇兮嘉禾萎而弗殖文軒不
知御兮敝輿是飾閭姝嫫母兮妍媸眩惑吳干
龍淵寧弗利兮謂不如鉛刀之斷擊濁世潛焚
兮又孰能遠夫姦慝昔晏嬰之辯智兮尼父輟
封而受厄姬文之拘囚兮崇侯搆其仇隙伍員
之殞首兮太宰進其僻說三閭之沉淵兮由子

蘭之嬖溺韓非斃於說難兮李斯爲之讒賊嗟
賈生之通達兮曾弗容乎絳灌宜夫子之於公
孫兮沉下僚而削迹

懲咎賦

余以回祿之警逮繫詔獄者百日幽困之極賦
以自懲其辭曰孟夏徂暑兮從獄辭歷杪秋兮
曠旬時遭幽辱兮抑志而自尤繫岸狴兮蹇纍
囚余不德兮嬰禍咎罪釁積兮逢此震怒祝融
孔威兮播凶虐挾飛廉兮火大作天降孽兮突
焚如官弛禁兮蕩丘墟乏裨竈之先智兮愧國

僑之訓令謀不臧兮詎曰予命 皇聽察兮汰
無私詔覆訊兮窮刑書嗟屢校兮荷黑索體膚
傷兮屢扶扑日冥冥兮錮陰扉寢下濕兮棘重
圍卒孔武兮恣殘詬蟲夢夢兮靡夜晝鼠羣嚙
兮蠍潛螫人燈半滅兮不見月星雨淋淫兮積
庭潦辱塗泥兮羌誰告叫天闔兮茂由聞構讒
言兮玉石不分夫何辜兮惟險酷身貼危兮備
百毒昔殷湯兮拘夏臺桀覆家兮禹緒衰周文
嘆兮羈姜里創易彖兮述玄旨治長縲綆兮尼
父亟稱鄒陽嗽書兮卒以自明伊古賢兮蒙困

難余何人兮避茲憂患懲夙愆兮心怵怵而弗
舒惜壯歲兮日月不居精內蝕兮玄髮變世莫
我知兮又誰怨亂曰有鴉萃止集于梁兮爰爰
者兔越崇岡兮鳳鳥翩翩時不祥兮儉壬敗類
忠賢藏兮詒厥典則思先王兮

宣幽賦

閒居無事兮聊秉翰以宣幽馳精思於玄奧兮
貫華實於皇流準微謨以布則兮騁逸軌以旁
求綜陰陽以經緯兮降質文而上下窺先民之
用心兮統萬象以變化躍弛張於鉤注兮旣疾

利而閒暇錯宮徵以低昂兮肅雖雖其和平爛
五色之相宣兮歛意匠於經營夔殊致而百慮
兮要矩式於準繩窮藝圃之根柢兮邈灑噩其
難名樂休澤之汪濊兮忘仄陋之末伎度流俗
而橫鶩兮冀端緒之未墜翔脩翼於寥廓兮何
迫隘之足累

北征賦

涉徂冬以就役遵脩轍而遐征緬井甸之絡繹
睇郊牧之縱橫泝廣津而戒楫指通關以抗旌
慨故里之睽絕憂煩傷以寡歡玄雲變其下覆

兮密雪霏霏於林端飢鳥叫嘯於中野兮增冰
憑岸而汎瀾念徒御之劬勞兮畏道路之險艱
聊騁目以宣寄兮申鬱陶於詠嘆惟小人之薄
劣謬薦名於有司屬康休之嘉運羅俊髦於綱
維握貞固以穀率範禮防以馳驅策駑足以遐
蹈矯勁羽於卑棲沐皇澤於天路企棧樸之周
詩

潛思賦

夫何玄象之迅速兮日月忽其不居測天地之
閉藏兮驗四序之盈虛宵耿耿其未旦兮獨室

處而靡寧志蘊結而未舒兮靜潛思於宵冥哀
民生之寡儔兮泪秉素以含貞退跼踖以畏咎
兮進嚙沓而邁閔譬流泉之胥潰兮憂感感而
靡騁誦小明之嘉什兮表靖共於正直懷北門
之苦心兮畏室人之交謫諒哲賢之委順兮抗
遐烈以爲式攝威儀於弗愆兮履溫恭維德基
播芬芳於天壤兮彌耄耋而弗渝苟中心其何
疚兮要神聽以保釐

閔俗賦

閔世俗之誣詆獨修姱以練要懲遺烈以旌植

飾鞿羈於中道秉幼清於初服固周容者之所
誚昔姬旦之申繇列如石以矢辭披騷經以繹
趣謂追曲其淪胥紛儀一而心結耿詠贊於曹
詩諒軌獲之弗渝又焉能遠夫毀咎戒甕坏之
戾緩和唇吻而弗狙考聖哲之所臧寧孤抗以
寡偶彼蘭茝之昭質兮挺幽谷而彌芳覽珪璋
及筐筥豈改錯其圓方苟啁訾以悞慢耻志墨
其弗章保厥美而委順庶旁燭於無疆

西征賦

有序

趙子景仁旣得告趨庭東魯反旆西秦言邁靡

遑遑歸孔棘友人表表叙平生之慷慨申衷曲
之鬱陶作西征賦一首夙昔綢繆諒非毫素之
所能盡所貴好爵攸縻周行相示云爾賦曰
沐皇祇之優渥奮遐躅於天衢稟官常於夙夜
徇王事以馳驅母氏告余以言旋兮指故域其
奔趨遵首丘之夙慕慨陟岵之辛劬叩帝闈
以哀籲曰揆余之中情奉明詔以將諭簡吉
日以遑征出國門而東驚導脩路以啓行望旗
旄之旆旆兮僕夫訖訖其靡寧總余轡于魯邦
兮出徂徠之下邑泰山鬱其具瞻兮遵孔林而

憑軾想遺音於絲竹兮悼璧藏之綴緝懼聖澤
之湮滅兮撫斯文而太息朝濯髮於天津兮夕
還轅乎西秦覽嬴劉之故都兮觀儉俗於岐豳
信河山之險固兮士習武而朴淳遭人文之賁
朗兮多逢掖之俊民挺殊質於荒陬兮馳英譽
於京甸甫弱冠以作賓兮卓羽儀夫胄彥流藻
論於淵泉兮決逸駟於奔電宏典述於秘府兮
彌博聞而洽見歷九州以尚友兮合道術以相
忘譬音聲之倡和兮咸取則於宮商念德音之
日遠兮宣惠好於茲章豈言說之云喻兮庶示

我以周行

別知賦 有序

僕之密交有王子履吉焉多能才美獨行人倫
少同濠閘長羣膠序諧聲共術實相孚暱王子
之貢於天官也僕感陽禹彈冠之誼循回路贈
言之情慨然賦述命曰別知要之終始焉爾
昔余未燥髮兮馳篤慕於英哲曠矯迹之難儔
兮諒褊心之寡協維王生之好脩兮荃中情其
固結胤神緒以昭休兮承丕祗之宏業騫逸軌
以高驤兮抗先民之皇烈旣沈志於經墳兮復

窮精於簡牒辯機緯之義象兮採術藝之琛奇
吐黃中之緒論兮布卓詭之妍詞式大猷以申
典兮何古人之足師包豈第之上仁兮含條理
之令姿敦人綱以周慎兮秉玉度其溫如誦棣
華之嘉什兮玩蘭臭之易辭翔藻譽於東序兮
騰茂聞於遐甸握靈珠而弗售兮慨和璞之徒
獻豈命運則然兮個時俗之蔽眩幸膂力之方
剛兮從有司之嘉薦叩天闈以彙征兮闢亨衢
而豹變期良田於晚歲兮庶修名之早建

秋水亭賦 有序

梁故都會多池臺園苑慨梁王枚馬之遺事竊
心慕之思遐游博觀訪古咨今以快其平生未
之有能郭子舜符向余言梁之美曰吾梁產也
梁之郊平臺在焉有水濱之吾構亭焉疏以葦
蓮蔽以藻荇凝神發智是甚宜於秋因感蒙莊
秋水之旨命曰秋水授表賦之其辭曰

體天地之中區兮理陰陽以經緯辯貫利於墳
衍兮制廣輪於郊遂睠梁王之故苑慨崇臺之
蕪廢鬱嶢嶢之敦丘兮蹇陵遲而陂隄垣墉鞠
爲茂草兮穹谷杳篠而谿澗溢仙馭之緯繡兮

魯弗備降乎峻基之嵯峨枚馬弗可作兮大雅
契殄而寥廓悲質文於異代兮降百氏而求索
澡翰信足娛兮寃宗工之矩矱依藝圃以慰止
兮漱皇流而灌溉挹榮維之汎瀾兮涉波澹之
洞潰遡瀍澗之中坻兮辟灌樹以屏兌嘉感沸
之檻泉兮攘檠栢之蒼葦壁薜荔兮繁楣榭白
茅兮芟荷扉蘭椀兮松櫨芳芷辰兮藿爲帷糅
椒桂兮鏤堊繚杜蘅兮飾桴棗超形神於虛朗
疏心智於潔清齊萬有之畛域兮測五氣之虧
盈達終古之大觀兮馳宏論於莊生

麟山賦 有序

婁有九峯焉其一曰天馬黃門楊君士宜之別業在焉天馬麟也乃自稱曰麟山表聞其勝而未之游也援筆賦之其辭曰

偉吳會之奧區兮紛靈異其難詳維山川之閔峻兮苞元化於陰陽羗九峯之峩額兮奠樞位於婁方揭珍符於藪澤兮蔽海陬而枕江高岑截薛其設險兮絕陁宰豁以如堂防俯辰曜之森羅兮切閭闔以飛翔綿絡繹以迫隘兮森嶭峙以開張瞻天馬之嘉名兮表南服以作基竦

泰清以貞觀兮駭積岨之屈屣綴雲構於玄宇兮儼神明之攸居崇林鬱其屏翳兮脩阪扈以逶迤藹炎樹之冬榮兮雜栢桂與檉梧絳氣馥郁以氤氳兮瑤葩粲以歲蕤羨幽人之滅跡兮維嘉遯其攸宜馳玄情於寂寞兮澄煩念於冲虛挾長生之秘術兮永逍遙以無爲

中麓賦 有序

章丘之南爰有胡山其中麓則司封郎中李子伯華之別業在焉嘉靖十有八年天子幸承天李子以職事扈從遣吏走姑蘇邀余賦之其

北諸虜數寇邊鄙狡焉不靖夏六月遂犯我花
馬池毀我藩籬蹂我禾稼於是提督尚書臣憲
選將厲兵指授方畧諸將臣卿臣瑛臣義臣佐
率所統漢土游竒諸軍協規同力分道並進臣
雲賈勇陷敵覆之固原窮追逐北俘其醜虜三
百餘級器械畜產收穫萬計聲震荒外臣憲馳
捷以聞 皇上賜璽書褒美乃命幕府第其功
狀頒賞有差昔周之宣王興修文武之業以恢
張周道時則獫狁未夷命方叔征之六月出師
不遑安息故詩人美之曰六月棲棲戎車旣飾

又曰薄伐獫狁至于太原中興之功於斯爲盛
我 太祖高皇帝迅掃胡元奄宅寓甸暨我
太宗文皇帝親御六飛芟夷餘孽定鼎北極開
廓洪基肆我 皇上嗣統中興內修外攘思光
祖宗之業推轂授鉞懷頗牧而興嗟蒐卒補
乘咏車攻而嘉嘆是役也師徒不勤弓矢無辱
膚功休烈視周宣有光臣謹作頌以章中興之
盛且以震動海內傳示罔極焉頌曰

於鑠 皇明九葉重光 帝矢其謨嘉靖中邦
華夏蠻貊率享來王蠢茲戎虜干我天常負固

匪茹犯我朔方蹂躪師田繹騷邊疆天錫帝
祐允文允武推轂授鉞折衝禦侮桓桓元戎分
陝開府乃扞牧圉四鎮攸撫稟受成算壯猶克
舉左右節制進退規矩六月維夏虜敢跋扈隳
突城堡深入險阻神憤而疾士赫斯怒元戎帥
之爰整其部維時虎臣協規來聚嘽嘽推推塞
帷承弣二矛重英長轂百旅鍛乃戎兵劄乃樓
櫓旌旗蔽雲矢石如雨賈勇先鳴闕若虓虎殲
之固原俘其醜虜獻馘連連輜重咸取五日四
捷奏茲膚功旃裘震驚王庭以空露布朝馳于

甘泉宮

帝嘉乃勞寵賚攸崇錫之金帛貺以

彤弓策勲飲至廟謨斯弘昔在周宣委任方叔
六月徂征戒茲戎服獫狁于襄以匡王國赫赫
高皇草創天祿夷德腥羶底于刑戮昭哉

文皇光纘歷服六月出師迅掃獯鬻殺胡奏捷
奄定傾覆拓地開疆式固鴻休皇帝聖哲與

神爲謀功光周宣祖宗是侔維茲駿功元戎

之力皇有虎臣効順率職武功載揚王猷允

塞干羽兩階遠人來格弓矢斯櫜疆場永謐

皇帝壽考於萬斯年百祿是適如日如川皇

帝孝友光於神明獻馘 九廟洋洋來歆小臣
作頌以颺厥聲

河清頌 有序

明統天基命玄化浸潭休烈宣章珍符靈契譎
儻曼衍紛紛旁臆揭之策書傳諸故老難可悉
究肆我 皇上度宗視朔迪喆考祥盖六載于
茲而黃河清焉肇自靈寶達于平陽六日爲期
凡五十里澄逾滄浪洌並湘渭邑居聚觀司府
列狀謹按孝經援神契曰河者水伯上應天漢
京房易傳曰河水清天下平易坤靈圖曰聖人

受命瑞見于河是故歷代寶焉以爲聖哲泰亨
之徵昔宋元嘉中鮑照作河清頌彼偏方閩紀
政荒民慢猶且闕誕矜夸盛稱幽明同贊神祇
與能矧我四隩同風八蠻底貢雨暘若時昆虫
闐澤協氣薰蒸謳歌彌布爰降顯實以昭景福
凡我王臣鼓舞抃躍夫稽之圖緯旣如彼考之
功庸則如此而 皇上方謙冲警惕懿鑠弗居
祭告惟謹然茲事非細不有述作曷示康休臣
謹作頌雖詞義鄙猥文采不足庶以掄揚盛美
褒贊德業被之樂章竊附雅頌云頌曰

吞大河兮發源崑崙導岸額積石兮駭奔龍門
疏九道兮曰鉤盤鬲津淳滴炭漫兮激戾襄陵
趨傾赴壑兮兼包并吞渠澗消泮兮逝者徂征
潛流地中兮澗沮是經并渠千七百川兮汨漱
壤墳脉絡縱橫兮溷淆濁黃曲直疊折兮浩浩
湯湯涇水什石兮其泥數鍾人壽幾何兮河清
靡常於 皇受命兮肇茲吉康斤斤不顯兮上
帝降福簡穰河水清兮錫貺豫梁亘上下兮達
于冀方水維緩兮湜湜其清清且瀾兮顯渙揚
焯衝風謐兮蠙珠曜光陽侯弭節兮河伯獻祥

龜龍負圖兮游戲水中央
嶄嶄齒齒石泐嶸兮
藻繁榮曄淇園之竹青青如簣兮
璧殼下列河水清兮
皇心豫說 皇謙冲兮夙夜憂勤曰
皇天無私兮惟善是親謂河清爲異瑞兮無若
康茲小民綏遠爲邇兮在予 一人迓天休兮
敬共明神神懷柔兮小民救寧時雨時暘兮豐
年屢臻截九有兮天衢之亨允猶翁河兮地天
平成績禹功兮侈厥頌聲億萬萬兮孝孫有慶

皇太子生頌

有序

明嘉靖十五年孟冬之月六日 皇太子生率

土胥慶臣表謹作頌曰

孟冬元旬誕降皇儲於昭前星燭于北樞 皇
帝乃薦饗 宗祖叶禮神祇登億麗之玉牒進
萬年之觴壘啓奉天以受朝羅百工以奔趨騰
渙號以宥赦沛鴻恩於九區

袁永之集卷之十一

